

四庫全書

史部

欽定四庫全書

姑蘇志卷四十

明 王鏊 撰

宦蹟四

韓彥古字子師延安人蘄王世忠之子也兩知平江時
酒禁甚嚴士大夫家亦無敢醞造門卒捕一婦人肩
輿中斗酒入門者彥古問汝何從而獲曰告我者昇
輜之夫以簪花為識彥古曰人奴而訐其主乎杖僕
而遣之又士族之母訟其夫前妻之子者以衣冠扶

掖而來乃其嫡子也彥古曰事體頗重當略懲戒之
母曰業已論訴願明公據灋加罪彥古曰若然必送
獄而後明汝年老必不能理對汝遣扶掖之子就獄與
證徐議所決母良久云乞文狀歸家俟其不悛即再
告理由是不敢復至郡有士人持吏短長州將下車
必先投狀以占能否彥古至其人亦來彥古曰此狀
汝不能為必有吏人教汝者其人錯愕即以實告追
吏杖之一郡以為神明淳熙二年六月自以期年財

賦豐盈乞解郡務上以勞績陞敷文閣待制八月言
者論其以絹折輸麥每匹計四五石又以家力科稌
米多者至一二千石及敷上戶酒二千瓶吏民少忤
其意即下獄籍其家殘刻險詐無所不至自述理財
之效言所借南庫錢物皆已還足而提領所具數尤
缺七十萬貫以無為有遂落職放罷彥古性剛忍有
風裁不可干以私官吏尤畏憚之

莫漳湖州月河望族也淳熙初知仁和縣時有出入德

壽宮者恃勢強梗陵蔑良善屢追不出漳衣綠袍候于宮之外門俟其出擒而撻之高宗怒孝宗降漳一官未幾復治一人再降一秩仍舊任數月間平江缺守宰執進擬孝宗曰朕有其人遂除漳院轄以承議郎知府事

王佐字宣子山陰人南省廷對第一授承事郎僉書平江軍節度判官廳公事未赴改秘書省校書郎又自知建康府徙平江未赴坐事削官後復自知揚州徙

平江政聲第一尤長於聽訟有小民告進士鄭安國
酒逮捕其人佐問何自知之安國以幼婢對竟得婢
與告者姦狀俱杖省遣之而釋安國聞者稱快改知
臨安府進工戶二部尚書

謝師稷字務本邵武人以右司郎中除集英殿修撰知
平江前守恃其富饒率多妄用未幾反病不足師稷
撙節浮費一以愛人為務初無橫取未滿歲積四十
萬緡以郡城圯壞奏請修繕遂為壯觀

王希呂字仲行宿州人渡江後寓居嘉興乾道中除右正言張說擢用僉書樞密希呂劾之責遠小監當既而上悔之改宮觀淳熙中歷中書舍人知平江府終吏部尚書

趙彥操宗室子也淳熙中以秘閣修撰使江西知平江府郡當孔道事緒萬端窮日力不給彥操治尚靜簡不為捷疾以聳見聞建御書閣風化庠序未嘗汲汲浚民而財用羨溢寬弛虛錢緡十四萬米四萬六千

斛歲滿以右文殿修撰再任又躋集英徙鎮江未上
改婺州

張巖字肖翁泰興人為人機警柔田附韓侂冑誣逐賢
者嚴道學之禁拜叅知政事以言者罷為資政殿學
士知平江旋升大學士知揚州遷知樞密院事侂冑
誅奪官

李大性字伯和四會人歷太府寺丞浙東提舉提刑為
戶部尚書忤韓侂冑出知平江移知福州除刑兵二

部尚書以端明殿學士又知平江引疾丐祠卒謚文惠

方導字夷吾紹熙二年通判平江郡務素劇閼決閒暇外臺多屬以事無不得其平兩攝府事尤為得體

陳晞點字子與青田人淳熙中任從事郎平江府觀察推官樞密丘崇為守屢以職事爭辨崇或陽怒折之晞點退立屏息俟其少霽執論如初至于再三竟不能奪自爾晞點書擬望而許之提舉羅默兼府事舉

兩司事無大小咸以屬之行荒政修水利決積訟晞
黜悉左右之

陳景思字思誠弋陽人以祖恩補承奉郎監平江府糧
料院光宗即位詔天下言事景思上十事多一時要
切授淮東總所幹官以薦除籍田令累遷直秘閣兩
浙轉運使

趙不熄宗室子淳熙中以忠翊郎添差平江府排岸兼
船塢公事十五年正月太宗正司奏其資性明粹舉

族稱賢堪繼嗣漢王士輅之後從之

莫子純字粹中慶元二年以進士僉書平江軍節度判官廳公事官至右文殿脩撰知江州

沈作賓字賓王歸安人歷兩浙轉運副使知潭州以龍圖閣待制知平江請得節制許浦水軍郡有使臣故海盜也作賓命招誘其黨既至慰勉之錫以衣物又得強勇者幾千人置將以統之號曰義士復募境內惡少亦幾千人號曰壯士衣糧器械皆視官軍而輕

捷善鬪過之於是海道不警市井無譁

李大異字伯珍隆興人開禧用兵為諫議大夫甫數月
坐論兵事忤韓侂冑以待制出知婺州未上改平江
踰年知建康府

趙希懌字伯和

一云叔和

燕王八世孫性簡重不妄言笑以

江西安撫轉運除知平江覈財用出入而削浮費無
藝者郡多舞文吏未及期年苗孿髮櫛官寺肅清以
治行進直學士尋以病告移知太平州拜昭信軍節

度卒聞者莫不殞涕謚正惠子與憲

與憲字德淵寓處州之青田

史云居湖州

嘉熙三年直敷文

閣知平江兼淮浙發運使特置司領其事自與憲始
四年郡中饑分場設粥以寓公方萬里為人所推敬
委請董役全活者數萬人寶祐三年以觀文殿學士
再守郡行鄉飲射禮于學宮復修飾殿堂齋廬廣弦
誦以嚴教養學官弟子為立生祠明年兼提刑六年
除江東安撫使知建康府景定初復知平江句祠封

周國公謚忠惠學者稱為節齋先生

沈緯嘉定七年以奉直大夫守平江磨勘轉朝議大夫
旋除浙東提刑十六年再任尋以職事修舉除寶謨
閣待制仍賜金帶寶慶元年試登極賦轉通議大夫
除煥章閣待制

趙彥櫚字文長秦悼王七世孫由進士主崑山簿後遷
湖廣總領知平江郡並大海盜出沒莫可蹤跡彥櫚
奏分崑山之半置嘉定縣屯兵以守又鑿錦帆涇通

運河以便舟楫將增隍為城而以邊遽少緩且以病
告轉寶謨閣待制卒于官

趙汝述字明可太宗八世孫累官刑部尚書知平江下
車宣布德意時許浦水軍顧涇民兵未霑正月受寶
之賜汝述請以安邊庫八萬六千緡均給之郡雖稱
富饒仍歲告匱汝述務以節用恤民為急城圯不修
條其工費當緡錢二十四萬米萬有四千斛奏請于
朝以殿步司二軍佐其役方具畚耒會病卒寓公方

萬里為經紀其喪事

吳淵字道父寧國人幼苦學歷秘書丞兼刑部郎官以直煥章閣知平江府兼節制水軍提點刑獄會衢嚴盜起警報至調遣將士招捕殲其渠魁散其支黨以功為樞密院檢詳文字兼國史院編修官改知慶元府江潭二州皆不赴知隆興鎮江二府兼都大提舉浙西沿海諸州軍許浦瞰浦等處兵船歲大侵因淵全活者六十五萬餘人除江西安撫使知江州遷兵

部尚書再知平江兼浙西兩淮發運使歲亦大稔又
全活四十二萬餘人除浙西提刑知太平州建康府
拜資政殿學士封金陵公知福州改知平江寧國二
府累疏辭免寶祐五年拜參知政事卒謚莊敏淵有
才略事功迄濟所至興學養士然政尚嚴酷好興羅
織之獄籍滅豪橫時有蜈蚣之稱弟潛

潛字毅夫嘉定中進士第一自工部侍郎知慶元府改
知平江條具財計彫敝本末以寬郡民與轉運使王

楚爭論利害授寶謨閣待制知鎮江府位至左丞相
王遂字去非一字穎叔其先德安人徙金壇高祖韶熙
寧中樞密副使遂十四對策江東漕司抵韓侂冑尋
以父任主富陽簿又三年及第仍舊任歷監察御史
累疏劾余天錫趙善湘鄭損陳晬等人心震悚姦黨
為空除殿中侍御史遷戶部侍郎四川制置使鄭損
本蜀人沮之差知平江遂與里人劉宰素同志宰嘗
稱遂為文雅健足以名世贈之言曰士友當親而賢

否不可不辨財利當遠而會計不可不明折獄以情
毋為私意所牽薦士以才毋為權要所奪當言則言
不視時而退縮可去則去不計利而遲回庶幾名節
之全遂至郡即以崇學校寬民力抑豪強正風俗為
務會兩倅六縣令賦詩勉厲時詣學為諸生講說吳
中理學愈盛洞庭西山村民徐汝賢以詐惑衆自言
能出神使人見神魂遊於空中及死者魂魄見朱簾
之內掠人財賄妻妾為害數十年遂鞠之殊無異者

乃毀其壇祀黥面鞭背投之盤門水中為辨惑文云
徐汝賢自號水僊太保今在水中且與魚鰕為侶如
有妖怪願以身當之又民間七月十五日多設盂蘭
盆會遂作文鏤板以禁謂孝子順孫若從其法則自
以父祖為餓鬼心忍之乎以時思親當祭諸廟由是
汚俗為之丕變復議除郡中淫祀以謂莫尊者天莫
重者祖宗之所自出國朝立天慶觀前奉天帝後奉
聖祖他祠不得與焉今岳神廟祠於此非所以敬天

事祖也禮天子祭天下名山大川諸侯祭其境內者
非此族也不在祀典五嶽為天下重鎮而東在兗州
南在衡州皆非本土所應望祭將以此廟為瞻儀堂
遷岳神像於修和觀事不果行復知寧國建寧皆著
美績家居久之除權工部尚書卒謚正肅所著諸經
講義奏議實齋文藁藏于家

王應麟字伯厚浚儀人九歲通六經淳祐元年第進士
從王埜受學調西安主簿差監平江百萬東倉調浙

西提舉常平茶鹽主管帳司部使者鄭霖異待之調
揚州教授寶祐四年以博學宏辭及第添差浙西安
撫司幹辦公事上策士召應麟覆考既上上欲易第
七卷置于首應麟讀之乃頓首曰是卷古誼若龜鏡
忠肝若鐵石臣敢為得士賀遂寘首選及唱名乃文
天祥也應麟遷國子錄歷官禮部尚書

陳埏字子爽其先侯官人占籍嘉興古靈先生襄之曾
孫也歷右司郎官直龍圖閣浙西提刑後以右文殿

修撰知平江府兼淮浙發運副使以戶部侍郎趙必
愿舉最詔特轉一官遷太府卿官至端明殿學士卒
謚清毅塏屢歷麾節軍民愛戴幕客盛多又樂於薦
士有可齋叟藁二十卷

謝堂字升道天台人丞相深甫曾孫淳祐三年由籍田
令除直寶章閣添差通判平江年踰弱冠敏給過人
憲使驟以獄事屬之有一案而直八十餘家之枉者
累官樞密使銀青榮祿大夫

徐鹿卿字德夫豐城人以右文殿修撰知平江發運副使力丐祠上諭丞相挽留之召權兵部侍郎固辭上又令丞相以書招之乃至極言君子小人甚切世務吳樵淳祐中平江節度推官賢而有才敏於吏事憲司請入僉幕多所裨贊諸司交薦之嘗謂人曰樵居官既久深知吳風吳人尚奢而爭勝所事不切寧拚百萬錢嫁女不能拚十萬錢教子弟寧捨十萬錢遣婢妾不能以一萬錢延好師友故使子弟不知書識字

金方口口口口
卷四十
但廣置田宅計校微利殊不思異時反貽子孫不肖之害故人以戾目之蓋以此也

趙與峇字中父秀安僖王五世孫寓籍歸安曾祖伯圭
憲靖王祖師垂新興恭襄王父希永朝奉大夫與峇
初以父蔭調饒州司戶參軍辟監海昌鹽場易黃姚
運鹽浙西茶鹽司主管文字浙西提刑司幹辦公事
淳祐十年知嘉興府除直秘閣兩浙通判改提舉浙
西常平義倉茶鹽公事寶祐初直寶章閣浙西提刑

二月兼提舉十月知平江府景定四年九月復起知平江府兼提刑十一月兼提舉後卒於官禮部侍郎東平劉震孫誄曰與嘗於時為循吏於朝為名臣於國為信厚公族世以為知言

木待問字蘊之溫州人方逢辰字君錫淳安人姚勉字

成一高安人皆登進士第一授平江僉判

待問乾道初逢辰淳

祐十年勉
寶祐初

程元鳳字申甫徽州人歷任至丞相兼樞密使開慶丘

興疏言兵事時忠却將議建儲上意未決問元鳳曰
忠王此朕如何對曰忠王無陛下之福臣無彌遠之
目由是忤旨判平江府兼發運使度宗朝守少保致
仕

鄭霖初以朝奉大夫權發遣兩浙西路提點刑獄公事
至淳祐八年正月暫權平江府發運司事七月除直
寶章閣知平江府事兼主管浙西兩淮發運司公事
兼措置浙西和糴以其月交割十二月又命暫權浙

西提舉其月磨勘轉朝散大夫九年詔以職事修舉
除直華文閣依舊職

王燾字仲潛一字伯晦新昌人端平間由進士知常熟
縣興學舍飾社稷正經界立役法勅義阡百廢具舉
以政最聞遷禮吏二部尚書加龍圖閣學士知平江
府淮浙發運使五年入朝燾為人清修剛勁賈似道
過新昌燾獨不見洎入相於宋亡之際天下所係屬
而卒與陳宜中不協而去

包恢字宏父建昌人由進士歷除直顯文閣浙西提點
刑獄是時海寇為亂恢單車就道調許浦瞰浦分屯
建砦一旦集諸軍討平之嘉興吏因和糴受財百萬
恢被旨慮囚曰吾用此消沴氣乃減死斷其手下官
有包尉者持孝肅公畫像及家譜來謁給恢為叔父
恢荅書云某盱江微族妄庸無侶安有是邪力拒不
受景定中以華文閣直學士知平江兼發運使至郡
聞迎官供帳皆敷抑市肆民不能堪首以所得供堂

緡錢盡償其直郡中酒課常時為守者公費外悉以
自歸恢節縮冗濫以其贏補九任度支逋欠及支給
許浦兵糧去官之日府庫剩錢六百餘萬時派買公
田恢奉行稍過頗失時望召赴闕奏事移知紹興府
官終僉書樞密院事恢所至破豪猾去姦吏治蠱獄
理逋負政聲赫然卒謚文肅

鄭士鉉字鳴道鄞人久歷邊陲素諳兵政宰公安民尤
安之生為立祠歷添差通判平江除將作監簿當官

不畏強禦公平無私

向士璧字君玉常州人負才氣累通判平江歷湖南制置副使解潭州圍進兵部侍郎為賈似道所擠死

王伯大字幼學福州人端平三年試將作監兼右司郎中兼提領平江百萬倉兼提領措置官田進直寶謨閣樞密副都承旨兼左司郎中淳祐中參知政事

王烜字晦叔丹徒人以父蔭監平江府比較務建康府大軍倉不事進取好讀書論議古今一時論者以孔

北海補平原比之樞密曾懷薦改宣教郎知天長縣
趙崇禪字叔茂太宗九世孫尚孝廉有才行由進士乙
科調樂清尉平江府錄事參軍辟淮浙發運司幕官
官至文林郎

趙順孫字和仲縉雲人咸淳四年以顯文閣待制知平
江兼發運使先是郡庾赤立率以夏初徵民租順孫
謂古者十月納禾稼今先期半載民何以堪僉曰此
例行之三十年不然將有乏興之憂順孫不聽首以

俸入及例卷所供助糴本抑浮費以繼之糴幾二十萬斛迄免預徵郡大治創學道書院俾諸生肄業焉五年召為吏部侍郎

常懋字長孺武康人顯謨閣學士同曾孫也淳祐七年舉進士調常熟尉公廉自持不畏彊禦部使者交薦之調婺州推官以臨安尹馬光祖薦辟差平江府百萬倉檢察不受和糴事例戢吏卒苛取發運使兼提刑趙與憲屬懋檢覆雪無錫翟氏冤獄監江淮茶鹽

所蕪湖局改知嘉定縣歲大水勸分和糴按籍均敷
發運使王某提刑孫子秀俱薦于朝僉書臨安府判
官拜監察御史言天變及賈似道家爭田論繼皇子
竑嗣尋為兩浙轉運使修築海鹽海晏塘既而以集
英殿修撰知平江府值旱故事郡守合得緡錢十五
萬懋悉以為民食軍餉助蠲苗九萬稅十三萬版帳
十六萬又蠲新苗二萬八千大寬公私之力飛蝗幾
及境疾風飄入太湖節浮費修守庫既代有送還事

例自給吏卒外餘金萬楮悉不受吏驚曰人言常侍郎不愛錢果然改浙東安撫使

潛說友字君高縉雲人咸淳中為臨安尹因捕賈似道私賕去官踰年起知平江元兵入境適時宰欲以金銀往舒城犒師路梗不進寄留郡帑說友遂以此偕表同詣元軍自以全城為功朝廷既知其事以文天祥代之說友後從二王入閩廣留守福州反覆向背復歸于元以為宣慰使而王積翁副之軍糧不時給

為積翁所激軍將李雄遂殺說友剖其腹焉

文天祥字宋瑞一字履善廬陵人寶祐丙辰進士第一
德祐元年除浙西江東制置使兼江西安撫大使知
平江府常州告急遣麻士龍尹玉洎淮將張全曾全
等往援之戰于五牧曾全等先遁諸軍敗績張全不
援麻士龍尹玉皆死之平江大震天祥斬曾全以徇
未幾陷元屠其城守將劉師勇來奔會獨松關告急
留夢炎陳宜中議棄平江趣天祥入衛移守餘杭天

祥猶豫未決兩府劄至乃委印於通判王矩之時督府遣環衛王邦傑援常留平江因責邦傑以城守天祥去平江數日邦傑開門迎降都人大駭議天祥棄平江天祥出兩府劄榜之朝天門衆始定進資政殿學士浙西江東制置大使兼江西安撫大使二年以資政殿學士詣軍前講解巴延留不遣索多問曰何以去平江天祥曰有詔趣入衛問兵若干對曰五萬索多嘆曰天也使丞相在平江必不降但累城內百

姓耳

張世傑范陽人歸宋累立戰功德祐初為保康軍承宣使總都督府兵遣將四出浙西諸郡復平江安吉廣德溧陽諸城兵勢頗振七月與劉師勇諸將大出師焦山兵敗奔圖山上疏乞師不報十月進沿江招討使改制置副使兼知江陰軍元兵至獨松關召文天祥入衛以世傑為保康軍節度使知平江尋召入衛二年從二王入福州

許應元字長卿臨安人授平江司戶參軍知府文天祥
辟置幕下國亡不娶不仕教授以給養母及弟母喪
盡禮時人高其誼

趙全趙寧人元初由軍功膺寵及下江南授懷遠大將
軍湖州路總管至元二十年改平江在任開耕荒田
六百三十餘頃增戶口至九百七十戶構豐樂嘉會
太平安和熙春酒庫二十三年得代時方內附頑民
故犯法者嚴治不少貸若因繇役受捶則瞑目嘆曰

以徵科而罰尚忍加重乎繼除杭州民泣送不忍捨
時擬為趙廣漢云

戎益順德人初任值歲饑親詣各縣勸率上戶賑濟得
米一萬七千有奇民賴以生

董章字文卿真定人為人廉明其政毅而寬至郡未幾
獄訟稀鮮公退不入內闔清坐弦歌每至夜分作善
教二十四條以勸民大抵以厚風俗為急博學尤精
春秋善大書重創姑蘇驛等題顏皆其筆紫陽方面

為記政蹟之略

祝岫字秀巖

一云碧山

以字行松江人大德間為海道都漕

運萬戶府經歷就陞平江路總管岫為人英拔豪濶

篇翰清美同俞琰學易講治甚精所交多一時名俊

與趙孟頫朱德潤氣誼相許卒于官子孫遂家吳中

劉肩字嗣宗良鄉人積官至山北道廉訪使皇慶二年

來為總管問俗察情發姦摘伏洞燭民隱吏弊若素

官南土者臨事執義不苟懲惡則濟之以猛癯然若

不勝衣未嘗疾言遽色素守清儉門無私謁延祐元
年詔經理田糧條令嚴峻事鉅而限迫莫不駭懼肩
威信素孚人不敢欺昔之詭寄者翕然自實時江浙
會十八郡守臣欲概定田賦咸視肩言為從違肩毅然
爭曰地有肥磽厥賦宜不齊一旦更改民病何時
瘳乎由是得仍舊貫二年郡境螟蛉白之行省仍屬
肩閱實遂悉蠲之縣民執役定里正主首有產去稅
存之患肩建隨產當差之議科舉初行士赴會試者

闕公宇燕餞之三年正月卒喪不能舉僚佐賻歸葬
師托里圖一名克恭字敬之寧夏人由兵部侍郎遷平
江路總管馳驛到郡先是賈人貨黍草入城匿稅事
覺併及城外餘積行省疑不決托里圖謂物不入城不
應當匿稅法悉以還之府縣司未絕之案積至二千
餘編攝吏曹期以日決無幾而畢州縣役民克里正
主首責以催科賠償往往破產或本都堪役調之他
都吏夤緣為姦托里圖如詔旨先田多上戶盡放下戶

從上推排不役於他都民乃便之其在城者曰坊正
舊以待闕吏克滿歲補吏其人熟於期會數十年不
改或欲以例役民動搖抑配且失業敗事托里圖榜諭
仍役吏屢肆乃安城中酒稅歲額八千定以百八十
戶認辦不均托里圖曰擇二十戶可也民出已本營官
息則價之高低隨物貴賤官府用酒亦以見鈔沽買
自是絕差認之擾漕府運糧每歲船戶務多斛面托
里圖兩平之使客如賜田莊官歲利其廩給逾年延緩

不返托圖禁其濫給飭館舍造學宮嚴聖賢像善政
非一見宜春丞龔璠記

道通高昌人後至元二年自信州路總管轉通議大夫
平江路總管三年積陰以風稻用虛秕屬邑上菑狀
道通遣僚屬出履畝所履與狀合無一不讐郡多寓
公喜持短長往時郡守至必伏謁其門聽其言少拂
意輒構飛語道通至一切繩以法僞者不堪至京言
道通妄以歲凶誑朝廷事聞遣御史乘傳鞠虛時道

通已除江淮財賦都總管府達魯噶齊遂與僚屬逮
至嘉興詰究得其妄朝廷乃治言者罪初屬邑民訟
令不為直訴於道通通置籍籍民所訴送之邑務
得其情訟為之簡民輸歲賦豪右屬官吏初限皆細
民石加五六斗豪右至末限僅什四三而以細民多
輸者足之道通令初限必大戶齊足次及細民徵夏稅
繇亦如之推官汪澤民作去思碑謂其大致有四持
身嚴燭理明決事敏待人直又謂授宣命于朝者凡

十有三歷官多練事精然家益貧其來平江一無所
取可謂大丈夫矣

蕭義字仁甫遼人前徽政院斷事官至正八年到任郡
歲賦數百萬石長洲尤難辦大率土吏貪殘侵牟民
不堪秋糧每至次年夏初猶未足義拘累歲主稅土
吏所謂十老人者籍其貲數令其辨認本年秋糧繩
以法而嚴條約以督之過限不足即沒其家以償又
禁格監局催糧祇候禁子火家之屬添造斗斛明收

什一為耗贈倉場不得高下其手土吏畏令履畝而徵至十月終三限齊足而民亦無害其他州縣不令而從咸不失期自奉清薄疾惡甚切嚴刑峻法以律吏胥皆懾伏時以蕭打鬼稱之

汪澤民字叔志宣城人以進士累官禮部尚書性廉孝慎許可嘗為平江推官任法允恕獄多平反淮寇闖境倡鄉人保里閉城陷遇害詔贈江西行省左丞謚文節

俞庸字子中嘉興人為平江推官才而尚德年饑穀貴
流殍塞塗憲府檄庸董倉庾庸上策糴賑全活數萬
無何淮兵壓境庸聚勇士鎗守盤門時郡守貢師泰
治中高安等舉室以竄亦率庸行庸厲聲叱之曰公
等以世臣守大城一旦臨利害先民以逃不顧義與
恩邪安持鉞簡擊之仆地遂開門兵至城下庸未甦
被擒置馬下頃之甦以計脫去微服間道歸淞上久
之大府知其人將授以爵謝之曰吳門之役吾有死

所顧繫於亂卒不獲耳尚負面受他命見天日邪因憤病卒年四十五

何質國朝吳元年知府郡民久屬張氏割剥枯瘠殆絕生理質至勞來安集民拜更生之惠時詔徙蘇民為特甚質雍容裁處民若罔知尤申意庠序祀殿論堂已廢皆鼎新之朝旨以為勞民怠事質奔命闕下將寘極典質請忍死一言曰殺一郡牧以活百萬生靈質含笑入地矣遂得宥免復增秩以旌之

魏觀字杞山蒲圻人初以文學薦為國子助教歷浙東提刑按察僉事遷兩淮鹽運使入為起居注陞太常卿轉翰林侍讀學士侍皇太子說書於文華堂多所開悟稱旨兼授秦晉楚諸王經復為國子祭酒坐事貶龍南知縣召為禮部主事洪武五年出知蘇州府既至懲陳寧之苛鋤暴樹良寬而且肅敬老卹民大建學舍更闢孔子廟門舉鄉飲酒禮邀郡士周南老王行徐用誠與教授貢穎之校定儀節命諸生習

行之郡既多耆彦又有三老人曰崑山周壽誼年百有十歲吳縣楊茂九十三歲林文友九十二歲皆延致特席禮成彬彬可觀壽誼還又躬餞諸郊再拜觀者如堵牆未及三載風化興洽封部皞然課績為天下最六年陞四川行省參政未行復召還與宋濂輩錫宴奉天門上曰前日送卿還今日與卿飲何其樂也命各賦詩紀之又以蘇非觀不可為命仍為守七年觀以郡舊治曩在竊據今治隘弗稱圖復之地多

水患郡城中河頗加浚濬御史張度劾觀非時病民
且有危言遂得罪死上仍令以禮遣葬特賜諭祭皇
太子諸王亦致祭焉

王興宗應天府人洪武七年由懷慶知府調蘇州政
尚寬簡愛民之心若保赤子十年召還除河南布政
使

李亨吉安人洪武十年由磨勘司令轉蘇州府經歷
復陞知府性樂易事不苟為為之輒有惠利十一年

內艱去民不得留涕泣送之十二月上賜勅并米五十石鈔二十錠勅略曰曩為郡長恪慎廉謹以奉憲章古稱循吏不是過也

湯德高郵人洪武中常州府通判有能名十一年遷守蘇郡敷政嚴明而持法不苛吏民畏愛之

王觀祥符人洪武十九年由舉人選授知府府有奸吏錢英累構陷長官觀廉得至便捶殺之百姓稱快事聞上嘆賞遣行人白思中賜勅勞以酒時荐遭菑

凶民逋無所從償乃延諸富家集郡衙飲食之風使出儲積以補不足衆驩然逋乃給觀為政嚴整亦興建民仰之如神明

金網嘉興人為守時官民田則數不齊上疏請減重額田得罪賜死

姚善字克一安陸人初姓李後復今姓由鄉舉歷祁門丞同知廬州重慶所至有能聲洪武三十年擢知蘇州府初上以吳民熏染奢僭靡習豪室田宅輿服

往往踰檢明法以整齊之嚚者或更籍持短長賊譎
蠱起復號難理善洞達政體周悉人情張弛寬密各
協事宜又數造請郡中賢哲考求治道商略民生休
戚俗尚淳漓以施消息因革繇是吏民顧尚廉恥好
善趨義風美物安轉稱大治為列郡最隱士王賓獨
居陋巷善往候見舍車獨詣門以指扣之王賓問為
誰應曰姚善乃開門延語及賓報謁面府門載拜而
返善聞自追及邀還賓辭曰非公事不敢入也又將

候韓奕奕避入太湖善歎曰韓先生所謂名可得聞
面不可得見也錢芹自守甚高善願見不可得將往
候乃使人先道意芹對使者曰芹誠幸見公然芹民
也禮不可往見于庭苟明公弘下士之風請伺月朔
胥會於學宮善如期至迎芹置上坐請質經義芹曰
公今有官守請姑舍是事有急於此者善問何事芹
出一簡以授善竟不交一言而去視之則守禦制勝
之策也善心嘉之後薦芹為行軍司馬

徐庠字宗實黃巖人負才抱氣有經時之志元末厭世不仕洪武初應薦入朝數被顧問數對明切皆中時宜上喜將授憲職庠辭乃除銅陵簿請迎母就養忤旨謫役湘陰驛未幾選教駙馬能以師道自尊召見獎諭擢蘇州府通判奏發粟二十萬以活饑民春漲病隄庠相度原隰大興築捍之役部使者以為妨農勞民庠言他役誠妨農水不退則田不可耕妨農孰甚焉且令有田者量募貧力饑人得哺正所謂佚

道使民冒為勞哉卒就其庸屬邑有樓貞婦奏乞旌
表禮部謂前朝事不允厘言死生有間則比干之墓
誰封禮官不能奪從之官終兵部侍郎

蕭鵬舉泰和人以賢良應薦太祖命賦指佞草應口
成篇上大喜授蘇州府同知以寬厚清慎見稱陞山
東鹽運司副使

孫黃字仲衍南海人洪武初為翰林典籍歷使秦晉
楚蜀之境改蘇州府經歷後左遷平原復戍遼陽卒

黃文業婉麗尤工詩有西菴集

況鍾字伯律靖安人始以吏事呂尚書震震薦其才
授禮部主事進郎中蘇郡由永樂以來長吏治狀鮮
著朝廷屢遣吏督責無效宣德初以雄劇十郡缺守
慎擇良牧尚書胡忠安公等遂舉鍾典蘇郡復請賜
勅以便行事乘傳赴郡鍾固已洞灼郡弊蒞任吏胥
抱案牘請署以嘗鍾鍾默然若無能為既三日吏復
請署鍾曰若謂吾不事事邪歷舉三日牒無一遺互

摘其間某為故出入若失出入隱竄顛倒立取一二輩即度下撲殺之僚屬震栗鍾因并舉僚屬貪懦者立黜之搜逐胥屬主文積蠹置通關勘合簿以防詐偽衛卒久暴橫痛加繩禁郡體始尊嚴勢家侈恣不法鄉里武斷咸取杖殺之而扶惠單弱置善惡二簿察民善惡者籍其名既施行則著列以示勸懲婚喪不時者召諭反覆而峻其校督刑罰民畏而感無不從令鍾既達而果又素忠直簡在上心故凡所論

列悉賜施行郡田有官民之別官田稅額特重鍾擬
奏求減焚香自祝或動以禍福不顧疏上卒得所請
凡奏減省重額正賦田糧七十二萬一千有奇募民
開墾荒田起科以免逋年包荒之糧至一十四萬九
千五百有奇停徵滄沒田糧二十九萬五千免舊欠
糧草鈔數百萬錠罷平江伯董漕歲取民船五百艘
免買船米十五萬一千八百石疏免詔買減濶白三
拔布七百疋銀數千兩奏革倭船徵需無度請濬淪

水道淤塞辨明平民誣入軍者千八百餘家招復逃
亡三萬六千七百戶凡所罷行皆網紀大務民到于
今受其賜尤重於事神社稷山川龍母泰伯伍員范
仲淹諸祠宇皆拓而新之享獻誠慤雨暘祈禱輒響
應興崇學校敬養才哲薦拔孤寒有起家為近侍者
剛敏敢為不懼權要度量廓如朝廷累有褒勞述職
陞辭上為錫宴賜詩恩寵甚至而以蘇人仰藉倚以
守御不遷其官鍾亦無倦丁內艱去任民上請乞還

鍾治復除仍舊任正統五年九載滿去闔郡之民上
章乞留往扣闕者八萬餘人遂再遣任若赤子得慈
母七年無疾卒于位民益哀之

李從智宜賓人由進士歷官大理寺正正統十年擢
任知府從智性剛果郡人信巫覡多淫祀署小廟於
門交遍衢巷從智出行見之一日毀去

朱勝字仲高金華人由舉人累官刑部郎中知封昌
府正統間移知府事為人廉靜少欲勤政愛人政尚

中和而吏法精練聽訟不待筭朴物無遁情兩造簡
備廷無疑囚案無滯牘非重犯不遣入圜圜胥徒惟
奉行文書隸皂拱列而已嘗曰吏貪吾詞不付房隸
卒貪吾不行杖獄卒貪不繫囚人歎服之在官數年
鎮定不撓民安而化之景泰初擢江西右布政使久
而民思之

陳信字履信仁和人正統間自大理評事轉通判蘇
州未幾致仕為人礪名節甘儉泊政多惠愛比歸有

懷其德者同於吳江道中持金為贐信不受

楊貢字秉魁樂安人景泰五年以監察御史按蘇時
大饑死者相枕郡邑多缺官巡撫大吏號令煩碎民
無所控訴貢獨任其責殫力拯飭奏免災糧若干萬
開倉賑貸天順元年被薦受勅來守首立惠民倉實
粟以備凶歉次發酷吏安純等數人奸贓政聲赫然
持已素清嚴疾惡尤甚有豪右藉武臣求私覲貢捕
置于獄摘其賊殺等十餘事將論如法武臣為救解

於巡撫貢欲併舉之更構于朝三年朝遣武臣逮貢
與豪赴錦衣獄置對貢不勝困苦遂誣伏勒歸田里
遠近冤之

姚堂字仲升寧波人天順四年來守忠厚清簡不能
逢迎敬賢愛民雍然長者時林鶚知鎮江有聲巡撫
劉孜以更賢育民對易之人頗惜其去五年春檄至
即行什器帷帳一無所取先釀酒一缸以為蘇物戒
守舍者留候林為用民攀送塞路

林鶚字一鶚黃巖人動由禮法衛身甚嚴雅好文學
以儒飾吏未嘗為上官一屈膝對胥吏小民言必涉
經史威儀之盛望之肅然八年復以劉孜薦擢持憲
節江右臨行有書萬卷官至刑部侍郎

邢宥字克寬瓊州人舉進士為御史治宦者王振黨
獄有陰德擢知台州府天順間坐舊按河南失察裕
州守罪謫為縣丞成化初起知蘇宥有通變之才所
至有譽乙酉郡大饑斗米錢百三十文且無所于糴

宥賙貸甚勤民賴以生流人之在境者亦不失所然
而公帑不空富室無擾論者謂荒政之最善者至刑
名錢穀上供送迎調發諸具繁夥素號難辦處之綽
然聲稱籍甚二年知者交薦朝廷重其去止賜勅擢
參浙藩仍知府事後數月遂進都御史就撫南畿聲
名頗減治郡時五年以病乞歸

賈爽字希白巴縣人以御史巡按南畿有聲成化四
年擢知府事繼遵前政不事改作郡不勞而治為人

方嚴端肅人望而畏之操守介潔始終不渝八年以憂去官至副都御史

王貴永平人成化初自太學生選同知府事清靜寡欲臨事自盡職清兵籍惟求民不冤濫未嘗以上官喜怒已之殿最為意滿去民多思之有善政錄


丘霽字時雍鄱陽人舉進士除刑部主事成化壬辰來守郡性穎利彊記意度恢廓舉事沛然重祀卹民養士正俗初郡學門傍啟行者經文廟中雷乃買民

地直學宮闢門遷驛於胥門規模顯敞又訪冠祭射
禮儀目秩然命諸生習行之浚沮淤以利田歉歲請
減稅十二凡所務力行無所回卻治未一年諸廢畢
舉然性頗侈汰家人少戢竟以流言罷歸

華清字廉卿應城人以進士授郡推能書畫尤工於
詩

賀霖字時望鄱陽人弘治初以御史擢守郡郡民望
而知其仁鼓舞相慶盛暑蒞事凡舊政之墮者過者

不及者悉痛整齊之無時刻少休卒以勞悴致疾雖
在告猶數強起處分疾愈甚未期年卒道路相吊



姑蘇志卷四十

欽定四庫全書

史部

姑蘇志卷四十一

詳校官編修_臣曹振鏞

檢討_臣德生覆勘

總校官知縣_臣楊懋珩

校對官中書_臣李 燾

謄錄監生_臣郭洽怡

欽定四庫全書

姑蘇志卷四十一

明 王鏊 撰

宦蹟五

鄭昌故吳令也漢王還定三秦項王聞漢皆已并關中
且東齊趙叛之大怒以昌為韓王距漢

陸烈字伯元漢初為吳令豫章都尉既卒吳人思之迎
葬於胥屏亭子孫遂為吳人郡中陸姓皆其出也

郎宗安丘人善京氏易風角星筭推步吉凶安帝詔公

車徵宗對策陳災異拜議郎除吳令到官一月時卒
暴風宗占以為京師有大火定火發時果如宗言諸
公聞之表上博士徵宗恥以占事就徵文書未到夜

懸印綬置廳上遁去終於家

真誥宗字仲綬占知火
燒大夏門既遁去居華

山下服胡麻得道
今在鹿跡山洞

元賓姓名缺元賓其字也以孝廉入三署除倉龍司馬
衛尉察尤異遷吳令憲陽春以加惠有鄭僑見思之
歌視事二稔民用寧康辟州從事召拜議郎延熹二

年卒

呂岱字定公

一云山公

廣陵人寬簡有雅量好賢愛士為郡

縣吏避亂南渡時孫權領會稽太守岱詣幕府出守
吳丞權親斷諸縣倉庫及囚繫長丞皆見岱處法應
問甚稱權意召署錄事歷餘姚長交州刺史交趾九
真太守始岱嘗親近吳郡徐原賜巾褱與言論後遂
薦拔原好直言岱時有得失亦公論之人以告岱岱
歎曰是我所以貴德淵者也

殷禮字德嗣雲陽人弱不好弄清識過人少為郡吏年
十九守吳縣丞孫權為吳王召除郎中後與張溫俱
使蜀諸葛亮甚稱歎之稍遷至零陵太守

孟宗

後避孫皓
字易名仁

字恭武江夏人初為驃騎將軍朱據軍

吏遷吳令時制不得將家之官宗每得時物未以寄
母常不先食先又有詔吏在官聞父母喪當須交代
故犯者加大辟宗喪母犯禁奔赴已而自拘於武昌
以聽刑陸遜陳其素行以為之請權乃減宗一等後

不得以為比宗仕四朝累遷光祿勳

謝詢河東人晉元康中為吳令表為吳二君孫堅孫策

置守冢

詳見冢墓條

江道字道載圉人也蘇峻之亂屏居臨海家貧求試太末令州檄為治中轉別駕遷吳令殷浩謀北伐請為諮議叅軍浩甚重之歷太常本州大中正卒

顧修期義熙中為吳令時縣西鄉有柿樹合本殊條

江康之考城人中書侍郎淹之父也文雅有才思東晉

時為南沙令

王遂之字宣約臨沂人詔議參軍環之子也少通禮學
博聞仕宋為吳令齊南康相光祿大夫

陳珉潁川人為吳令發摘姦伏境內以為神明與比地
傳僧祐高平張祐並以吏才見知宋世言長吏者以
三人為首

沈叔任武康人充曾孫也少有幹質為宋武帝太尉參
軍吳山陰令治皆有聲官至益州刺史

何子平潯人世居會稽少有志行事母至孝楊州辟從事史元嘉末除海虞令縣祿供母不以及妻子人疑其薄子平曰希祿本在養親不為已也母喪去官哀毀踰禮每哭踊頓絕方蘇大明末東土飢荒繼以師旅八年不得營葬晝夜號哭常如袒括之日冬不衣絮夏不清涼一日以米數合為粥不進鹽菜所居屋敗不蔽風日兄子伯興欲為葺理子平不肯曰我情事未申天地一罪人耳屋何宜覆蔡興宗為會稽太

守甚加矜賞為營家壙除喪既久猶以過毀殆至不
立幼持操檢敦厲名行雖處閭室如接大賓學堅義
明處之以默安貧守善不求榮進時彌貴之

祖冲之字文遠范陽道人也宋孝武使直華林學省歷
公府叅軍婁縣令入齊為長水校尉

鮑照字明遠上黨人家世貧賤少有文思宋臨川王愛
其才以為國侍郎王薨始興王又引為侍郎孝武初
除海虞令太學博士兼中書舍人臨海王子瑱為荆

州照為前軍掌書記子瑱敗為亂兵所殺

孔琇之山陰人有吏能仕齊為吳令有小兒偷刈鄰家稻一束琇之付獄按罪或諫之琇之曰十歲便能為盜長大何所不為縣中震肅後為臨海吳興太守在任清約政稱清嚴

周洽汝南人歷句容曲阿上虞吳令廉約無私齊武帝時卒於都水使者無以殯殮吏人為買棺器

江介建武中為吳令為政深苛或牘髑髏於門為介父

首介遂棄官去

公上延孫永泰中為南沙令會王敬則反衆至晉陵邑人范脩化殺延孫以應之敬則平贈延孫為射聲校

尉

宋書元徽五年敬則結楊玉夫等弑帝延孫其一與南史不合

傅翺靈州人祖祐山陰令父琰宋武康山陰二縣令並著奇績時云諸傳有理縣譜子孫祖傳不以示人翺為官有能名後為吳令別建康令孫廉廉問翺曰聞丈人發姦擿伏惠化如神何以至此荅曰無他也惟

勤而清清則憲綱自行勤則事無不理憲綱行則吏不能欺事理則物無凝滯欲不理得乎天監中為建康令復以能稱後位驃騎諮議

唐傭天監中為吳令鑄盤龍火爐翔鳳硯盖有司奏之詔禁錮終身

蕭介字茂鏡蘭陵人祖思話父惠循齊左戶尚書介天監十二年轉主客郎中出為吳令甚著聲績湘東王聞其名思共游處表請之普通三年以為諮議參軍

官至光祿大夫侍中

沈浚字叔原武康人涉學有才幹仕梁歷山陰吳建康三縣並有能名太清二年累遷御史中丞

卞華字昭岳宛句人晉驃騎將軍壺六世孫也孤貧好學召補國子生通周易及長徧習五經聚徒教授博涉有機辨說經析理為當時之冠江左以來鍾律絕學至華乃通焉位尚書儀曹吳令

陸蒙事梁為吳令節操甚高

沈炯字初明武康人少有俊才歷尚書左民侍郎出為
吳令侯景之難太守袁君正入援京師以炯監郡京
城陷景將宋子儂據吳興召炯委以書記之任炯固
辭以疾子儂怒命斬之炯解衣就戮以故獲免王僧
辨購得炯羽檄軍書皆出其手景東奔至吳郡獲炯
妻虞氏子行簡並殺之梁元帝愍其妻子嬰戮特封
原鄉侯徵為給事黃門侍郎領尚書左丞後陷沒於
魏尋還陳預大政卒於吳謚恭子

何之元，潯人，好學有才思，為袁昂所重。昂為丹陽尹，辟為五官掾，尋除信義令。之元宗人敬容位通貴，頻相顧訪之。元終不一造，或問之，對曰：「德薄位隆，覆敗可待。」吾懼及禍耳。識者稱歎。陳太建中，歷湘州刺史，始興王叔陵諮議參軍。及叔陵誅之，元屏絕人事。著梁典三千卷。禎明三年，京城陷，移居晉陵。隋開皇間，卒。殷不佞，字季卿，長平人。梁尚書兵部郎高暉之子也。少立名節，居父母喪，以至孝稱。承聖初，為武康令，有惠

政孝武受禪除婁令至通直散騎常侍

沈君高字季高吳興人君理第六弟也少知名性剛直
有吏能女為後主后早居清顯歷廷尉卿太建初東
境大水百姓飢弊以君高為貞威將軍吳令歷太子
中庶子廣州刺史卒謚祁子

王凝字叔恬龍門人文中子通之弟貞觀四年起家為
監察御史使益州時長史高士廉以勲威自重從衆
僚候之昇仙亭凝不為禮訶却之士廉甚恥五年士

廉入為吏部尚書會凝赴選遂出為吳令

按通子福時云凝為

御史劾奏侯君集有反狀太宗不信出為吳令杜淹奏凝直言非辜長孫無忌與君集善由是與淹有隙

王氏兄弟

皆抑不用

李寀唐太宗第十子紀王慎玄孫也為崑山令

岑仲翔鹽官人宰相文本孫也為長洲令時兄羲為金

壇令弟仲休為溧水令皆有治績宰相宗楚客語本

道巡察御史曰母遺江東三岑仲翔歷太子中允陝

州刺史

范齊融越州人為崑山令神龍中與于休烈賀知章賀朝包融為文詞之友齊名一時

談戲曲阿人長洲尉有詩名與包融等十八人為詩殷璠彙次為丹陽集

張旭為常熟尉因老人求判得觀其父所書益盡其法詳載人物條

顏顗琅邪人魯公真卿之子也為常熟尉弟頔字仁純為吳縣簿子孫遂家於吳

劉太真字仲適金陵人

唐書作
宣州人

弱冠以行義修潔詞藻

瑰異為蕭穎士所知廣德中以薦授左衛兵曹李栖

筠在浙西表為常熟令到官未期一邑自化歷官禮

部侍郎信州刺史

蕭存字伯誠

墓志云
字成性

蘭陵人梁鄱陽王恢之後集賢校

理穎士之子也亮直有父風能文詞與韓會沈既濟

梁肅徐岱等善李栖筠表為常熟主簿顏真卿在湖

州與存及陸鴻漸等撰韻書數百篇建中初由殿中

侍御史四遷比部郎中

蕭審工部尚書旻之子永泰初長洲令在任三年有理跡邑人畏憚之

王綱大歷九年以大理司直為崑山令政務化民始作學舍置博士弟子貧民興於學有不被儒服而行者莫不恥焉事見梁肅作修學記

盧東美范陽人大歷三年李栖筠為浙西廉使奏為從事十一年為吳令歷太常博士監察御史河南府司

錄考功員外郎咸舉其職梁肅稱其外寬內明敬事而信韓愈謂其少未出仕在江淮間與韓會張正則崔造為友好談經濟之略嘗以王佐自許天下大夫士謂之四夔亦期以相器云

滕遂貞元二十一年舉明經及第又書判登科歷大理評事長洲令攝吳縣時人歌曰朝判長洲暮判吳道不拾遺人不孤人謂有漢叔輔之遺風改侍御史供奉賜緋

王嵩幽州人大理評事適之父元和中為崑山丞

見韓愈所

撰墓志

李暎元和中為常熟令劉允文記新開常熟塘碑以誦其績

劉綺莊毘陵人為崑山尉研窮今古纂記浩博作類書百卷行於世名崑山編

權立同平章事文公德輿之從兄也敏學行薄於宦情為崑山簿德輿作序送之

劉尉者失名獨孤及言其傲迹峻政能使網不紊吏不欺卒以不苟合忤物為時所謫由長洲貶南巴

周思輯汝南人咸通間為常熟令歲旱禱於破山龍祠得雨邑人霑感皮日休記其事後為給事中

韋至誠唐吳縣尉

范志

許延祚朱梁時知常熟子孫遂為家

蔣文懌以朝奉郎試大理司直行常熟令事兼監察御史太平興國三年錢氏納土後首任七年去任餘杭

陸韶之作頂山龍祠記載其政事

羅處約字思純華陽人太平興國中擢第為大理評事
知吳縣有惠政時王禹偁知長洲日以詩篇倡酬播
誦蘇杭間後並召赴闕上自命題試之以處約為著
作即禹偁為右拾遺皆直史館賜緋魚在縣日作吳
郡圖經別有東觀集十卷禹偁為序蘇易簡表上之
詔付史館

王禹偁字元之鉅野人世為農家九歲能文畢士安見

而美之稱為小友太平興國八年擢進士授成武主

簿

一作威武

改大理評事知長洲縣其自叙云禹偁名利

之流也一身之計有親族妻子焉雖內無妾外無僕
不可去者凡百指晨有炊爨夕有脂燭伏臘慶弔居
其外月得俸金太半長物是以從官三年徒行而已
一邑之政有稅傭稅調焉土甚瘠而民不懈吏好欺
而賦愈重廉其身而濁者忌之直其氣而曲者惡之
懇無知音動有變畏去年多稼不登編戶艱食賦歛

之數有乖其期而民部督成於郡郡侯歸罪於縣鞭笞之人日不下百數葦菜色在面而血流於膚讀書為儒胡寧忍此因出吏部考課歷納質於巨商得錢一萬七千市白粳而代輸之始可免責春夏以來民有歸其直者蓋三分有其二焉時同年生羅處約宰吳縣相與賦詠人多傳誦太宗召試擢右拾遺直史館賜緋故事給銀帶上特命以文犀帶賜之屢遷翰林學士元之在朝嘗上疏曰臣舊知蘇州長洲縣七

千餘家自錢氏納土以來朝廷命官七年無縣尉使
主簿兼領之未嘗闕事三年增置尉未嘗立一功以
臣詳之天下大率如此誠能省尉三千員減俸數千
萬以供邊備寬民賦亦大利也出知滁揚二州咸平
初預修太祖實錄與宰相意不協出知黃州作三黜
賦以見志卒章云屈於身而不屈於道雖百謫其何
虧四年徙蘄州卒年四十八子嘉言

嘉言字仲謨天禧初知舒城縣方服除會真宗觀書龍

圖閣得禹偁奏章嗟美其切直因訪其後宰相稱薦
嘉言即召對擢大理評事知長洲縣既禹偁舊治而
嘉言年與官又皆同士大夫賦詩榮之遷大理寺丞
邊倣華州鄭人雍熙初錢氏納土倣首為吳崑山兩縣
復興學校俱有賢行璽書獎勞仕至殿中丞

李璵文正公昉族人也為常熟令淳化四年任滿赴調
時昉在相位言其父崧在晉為侍中漢末被誅周太
祖時已雪其冤還其田宅璵始四歲授校書郎及其

為今年近知命乞與陞擢詔授著作佐郎

王世昌字次仲許州人知鹽官縣改常熟轉運使張式以治狀奏充秀州判官終都官郎中

李維字仲方肥鄉人文靖公沆弟也為崑山令至道三年獲白龜獻之郡官終尚書左丞

趙稔字表微宣州人為入誠質寬厚以大理寺丞知崑山累官太子少傅謚禧質

馬尋字子正鄆州人祥符初進士授吳江簿兄彛戒之

曰到任半載可誦律書為治民之本後彛至縣詰之
答曰治在孔道疲於賓餞未暇及也彛不悅尋曰少
緩期諷之至冬果精律學繼登朝籍久參法寺有平
允之譽累著治聲彛之力也

趙球居開封畜書萬卷祥符中秘藏火四庫書皆盡球
上其家書授三班借職用薦知吳江縣武弁為邑自
球始天聖中修築松江亭終右侍禁

錢振天聖三年以登仕郎為常熟主簿

范文正公送歸
省詩云姑蘇臺

下水如藍天賜仙卿奉旨甘梅淡柳黃春尚
淺王孫歸思滿江南蓋郡人亦吳越之裔也

梁適字仲賢須城人翰林學士顥之子也天聖初為開
封功曹知府呂夷簡薦知崑山縣徙知梧州後拜相
卒謚莊肅

鼂宗恪字世恭以世父迥恩補將作監簿知常熟縣修
學校理溝防人賴其利

劉立言字禹昌臨江人以殿中丞知長洲縣多過客或
求發民以輓船一人不與郡官為移書亦不聽所至

興利除惡其去人輒思之

夏噩字公酉池州人以試光祿寺丞知長洲性卞急遇事輒發出語無隱情人多憚之提刑陳道古惡其輕傲据以私貸民錢按罪勒停坐廢十年文彥博為白於朝詔還其官

張方平字安道揚州人

言行錄
宋城人

景祐中知崑山時吳越

歸國未久前此豪民占田積訟有數十年不決者方平召問所輸租幾何大率百纔一二乃悉收其羨田

以賦貧民而訟亦息知州蔣堂得方平所著芻蕘論
上之後拜叅知政事以太子太保致仕卒謚文定

張先字子野湖州人康定初進士知吳江有惠政詩格
清麗尤長於樂府仕至都官郎中年八十九卒有集
樂府行於世

王庭堅字世美慶厯三年尉吳江政稱平允與令李問
議率民輸錢數百萬欲建廟學會有詔不許遂移其
材以建長橋橫截江湖間長二百餘丈民甚利之晉

陵錢公輔作記以精敏沈毅稱之

丘與權至和中為崑山主簿時議修崑山塘與權陳五
利且言事或不成請以身塞責即列其議以聞塘成
至今為利後趙抃薦其嘗為蘇州教授學者如歸因
窮守道未始隕獲王珪亦薦之曰藝文優贍議論純
正遭時右文宜見收采

韓正彥字師德安陽人魏忠獻王琦從子也嘉祐中知
崑山縣剏石隄疏斗門作塘七十里以達於郡得膏

腴田數百頃又請以輸州之賦十三萬從便輸於縣
鳩作塘餘材為縣倉以儲之民大悅比去遮道以留
為立生祠作思韓記饒石祠下

裴煜字如晦嘉祐六年令吳江歐陽修梅堯臣皆作詩
送之

沈遼字獻達錢唐人翰林學士遘之弟也為崑山令遼
幼不羣長益好學讀左氏班固書摹仿輒似受知王
安石及安石當國遼為審官西院主簿論事不合罷

後攝華亭縣他使者有夙憾因民訟連及下獄奪官
流永州更赦徙池州杜門隱几間為文章雄奇峭麗
與曾鞏蘇軾黃庭堅唱酬竟不再起

林肇字公權吳興人寶元中進士熙寧三年以尚書屯
田員外郎自請知吳江始至覽江湖之勝緬懷古人
慨然有歸歟之興乃即松陵勝處作鱸鄉亭繪三高
像其中既落成遂具舟由亭下拂衣而歸

錢勰字穆父其先嗣吳越王侑生易易生彥遠彥遠生

魏熙寧三年中秘閣選廷對入等會王安石罷其科
以蔭歷知尉氏崑山中書舍人給事中知開封府以
不避豪貴出知越州哲宗朝翰林缺學士命魏仍兼
侍讀為章惇所詆罷知池州元符末追復龍圖閣學
士

王幾字彥成江都人知舒城未赴丁父憂王安石知其
才選宰長洲縣政剛則路弱則廢幾平其政弛張以
時卒之懾服豪強貧細得職歲饑廣賑救之策人物

按堵權勢者欲侵撓之執度不回治聲聞京師

范擴為常熟簿曾輦舉其博學能文尤通經術敦重恬靜見於人為以母老家貧樂仕鄉土堪充館閣及國子監直講任使

陳察字晦叔考亭人擢進士知吳縣蔡京過之為書懸榜察不受京當國召命再至亟引疾致仕後入元祐黨籍年九十五而終

常安民字希古邛州人年十四入太學有俊名時取

程宗王氏安民獨不為變第進士元豐六年知長
洲縣邑中權豪肆橫訟牒日數千安民先正紀綱
圖籍以立政本省文移追呼以清訟原始至求亂
政者得何平丁文通朱鈞花三人杖而屏之終政
不敢至訟庭縣故多盜籍嘗犯者書其衣榜其門
約能得他盜乃除盜為之息鄉胥掌田里租庸之
籍移易輕重為姦弊莫能制募吏法當試因令根
摘版籍之欺隱代之獲冒請青苗者荷繫於庭使

指識冒名人以贖罪其約而有法皆此類也大率
以至信為本信既立人不忍欺催科不事鞭朴不
下吏手豫為信限揭實數於縣門使自諭輒先他
邑辦負坊場責者戶率十數人督之坐食其家安
民悉縱之使歸葺坊事與約分所負為三年自輸
之親為受之部使者聞愕曰常平法敢爾緩耶安
民曰異時以昔較今儻增溢不敢自以為能庶幾
邑人獲一飽已而償數果倍歲旱農盜決運渠以

溉田法當徒犯者且衆安民白郡守曰水所溉穀
成當得賦入數十萬今未至盪舟而寘人於法坐
失數十萬之入以此較彼孰利孰害請釋勿治是
歲吳大旱惟長洲中熟及安民去官犯者論如法
皆號呼田間曰安得常公活我於將斃轉運使許
懋孫昌齡入境邑民頌其政皆稱為古良吏其政
事之詳見自著長洲政事錄元祐初李常孫覺范
百祿蘇軾等薦擢大理鴻臚丞時姦黨分布中外

安民貽書呂公著引喻明確及章惇作相其言遂
驗安民正直敢言蔡京用事入黨籍後謚敏節

鄒浩字志完晉陵人元豐進士調吳縣簿元符中以言
事監袁州酒稅責授平江軍司馬南安軍安置卒謚
忠

洪彥昇調常熟尉奉母之官既至前尉欲申期三月以
規薦而中分俸入彥昇處僧舍卻奉不納如期始交
印

郭三益字慎求義興人元祐進士才高有器識大臣屢薦之為常熟丞常平使者調蘇湖常秀之人濬青龍江分地程役三益所部前期告辦使者留其人使助他邑三益徑引歸使者怒檄追甚急三益頗為戚其母周曰使者行悔矣然不可無往第無以部人從三益如教使果檄止丞勿來

徐勣字元功南陵人舉進士調吳江尉終顯謨閣學士挺挺持正為徽宗所禮重而不至大用時議惜

之

石公轍字道叟新昌人紹聖二年特奏狀元任南劍州教授轉吳江令初學宮在縣治西南厄於兵公轍以東門外開江營舊基改建又置田給士養即今學也後通判平江府陞大宗正

向子韶字和卿開封人元符三年進士知吳江縣郡人私鑄錢流布一路郡將聽自便子韶以為不可騰書極言之下令禁其部無敢犯者已而中司論

其事詔置獄繩故縱之吏諸邑皆曰太守命也吳
江令嘗力爭書具在子韶聞制使來謂須被逮具
裝以候吏及門即行初知州意子韶必以抗論不
從為詞子韶至卒無一語獄成守以下皆貶秩子
韶賞一官大觀三年除開封府右參軍靖康中知
淮寧府與金人巷戰舉家被害贈通議大夫謚忠
毅

虞賓字舜臣山陰人以宣德郎知長洲縣縣多富室大

姓歎負強亂法黠吏橫索亡度率倚公以漁獵民二千石無敢成其罪賓張設耳目盡得姦利鉏治之一縣屏息歲大侵民無蓋藏部使者猶急宿負檄下曰必辦賓閣束文書不問使者怒賓進說云云使者驚謝之會邑民遮道願借留虞君即表民言於朝累遷比部員外

闕
懋字叔夏贛州人崇寧間主吳江簿歷仕至禮部尚書

程俱字致道信安人元符中為吳江簿政平訟理有循良之風優文學作松江二賦三高祠詩序遠近騰誦之卒官中書舍人後簿高文虎以曾懋及俱為此官作曾程堂以寓景仰范成大為之記

冠國寶吳縣簿

葉夢得詩話云余居吳下一日出閭門至小寺中壁間有題詩一絕云黃葉西

陟水漫流蘧蔭風急滯扁舟夕陽暝色來千里人語難聲共一丘
意極喜初不書名氏問寺僧云吳縣冠主簿所作今滿去矣歸而問之士大夫云冠名國寶蓋與余同年然皆莫知其能詩已而數為好事者舉此詩始有言國寶徐州人久從陳無已學乃知文字淵源有所自來亦不難辨恨不得多見之也

張克戩字德祥開封人侍中耆曾孫大觀中知吳縣俗
好訟大姓怙勢伺持官府縣令踵故俯首務為不生
事幸得去而已克戩一切裁以法姦猾屏氣部使者
以狀聞召為衛尉寺丞靖康初金人攻城克戩畢力
捍禦外援不至諸帥列城逼降克戩臨陣大罵朝服
南面焚香拜舞引決一家死者八人事聞贈延康殿
學士謚忠

錢中庸吳越武肅王玄孫用父哲蔭為郊社齋郎調吳

縣簿不樂仕宦隱於郡之峨眉山而卒

陳瓘字瑩中沙縣人元豐進士徽宗朝自正言遷司諫
數言事天下傾注之政和元年再被謫主吳江簿未
幾卒贈諫議大夫謚忠肅

梁澤民將樂人政和中為崑山令有惠愛其父伯臣來
就養陰相之力為多

陸宗字元珍政和中知長洲縣政久棼窠從容如無事
而事大治以最遷郎就命通判真州

紀交字聖錫丹陽人大觀進士自蕪湖酒稅改知吳縣
會水利不修部使者獲罪亦坐免繼知鄱陽縣遷通
判平江府終兵部尚書

陳康伯字長卿弋陽人宣和三年進士調長洲簿改京
畿運司屬官後至左丞相封魯公卒謚文恭改文正
趙訓之字誨道秦悼王五世孫以進士調東平儀曹知
吳縣朱勔怙勢役州縣訓之不為屈勔嘗執數人詣
縣請治訓之悉縱不問遂移疾去建炎中知永豐孟

太后在贛州統制杜彥叛後軍楊世雄應之將犯永
豐訓之與尉陳自仁設伏殲之會賊別校繼至官兵
未成列訓之拒戰厲聲罵賊與自仁俱被害事聞贈
訓之朝散郎直秘閣謚忠果邑人立祠祀之子彥攏
自有傳

鄭穆字應和長汀人家於無錫由定遠令改常熟丞攝
縣事有潰兵絕江由福山闖關邑人大恐穆單車撫
諭遂皆革心有久訟得直袖白金數斤為謝穆卻之

終朝散郎徽州通判

余彥嶼知常熟縣建炎三年韓世忠帥兵自海道從縣赴郡會張浚勤王四年烏珠犯郡李閻羅屯兵於縣彥嶼並周旋其間

尹機紹興中以趙鼎門客恩補官知長洲縣秦檜當國以賊追勒檜死復元官

祝拱卿字德良建安人慷慨有志節出入張浚幕下紹興中知長洲縣卒官

王彥融字炎弼江州人樞密副使韶子也紹興中知長洲縣權崇德德清皆以善政稱

王綸字德言建康人十歲能屬文第進士授崑山主簿紹興二十四年以中丞魏師遜薦為御史論事忤秦檜罷去檜死召為起居舍人歷同知樞密院事卒謚章敏

程沂字詠之洛人伊川先生頤之從子也紹興間知崑山縣為政中和有古循吏風

曾慎紹興中宰常熟立縣令題名碑王伯廣作宣風樓
記稱其知足以知勇足以行御吏若西門之治鄴愛
民如子產之治鄭云

趙彥真宗室子寓會稽舉進士以宣教郎知吳縣時營
思陵轉運司調取洞庭青石期會迫彥真即日凌湖
至其地名工泣諭之民感動趣役先期告畢使者欲
上其勞彥真辭之秩滿通判袁州

謝深甫字子肅臨海人由嵎縣尉調崑山丞寧宗朝拜

相理宗朝以孫女為皇后追封魯王諡惠正

柳楹字安叟東海人乾道元年宰吳江作松陵漁具圖待制曾幾序之刻石今存縣堂西垣

徐侶道字淵子天台人早負才名為吳江尉受知范成大及為秘書少監朝聞彈疏以舟載菖蒲數盆書兩篋翩然引去道間爭望之若神仙然

王萬樞字贊元金壇人為崑山尉得海盜溢格吏請出郊以應親獲之文萬樞據實却之終奉直大夫知吉

州

陳壁字君玉為崑山主簿注情教養講勸甚勞邑士造請無虛日成就極多

高文虎字炳如慶元人禮部侍郎閔之從子登紹興進士調吳江簿曾幾守官在吳文虎從之游聞見益博多識典故寧宗朝為中書舍人兼直學士國子祭酒後附韓侂冑共攻趙汝愚朱熹道學之士皆為訕罵陳資深常州人為長洲簿洪邁為禮部侍郎薦其性資

開明問學純粹持身潔廉務在便民不為利誘威脇
使膺百里之寄必有卓然可觀者

趙善言字從之祖守江陰因家焉初調常熟尉劉頴張
孝伯俱見器重終朝請郎知臨江軍勇為利民之政
兩邑一郡皆有陰德

趙善宣淳熙中知吳縣有通州人高枬詣京訴事時駕
過南內枬在望僊橋河中山呼唐突壽皇止輦問之
降旨送大理取案牘自閱辭言善宣卻金不受詔特

轉一官訟亦遂決

趙公廣字德儉淳熙四年任吳江知縣重建廟學及郵亭使館橋梁祠宇皆一新之遷徐州同知

葉延年字公是處州人嘉泰中知吳縣有豪民張某族數十人皆以虎自名居光福山澤間負險固聚仇黨四出侵暴既三十餘年延年禽寘於法邑人德之立祠於瑞光寺

葛洪字容父東陽人從呂祖謙學為崑山尉理宗朝參

知政事杜範稱其侃侃守正有大臣風卒謚端獻

潘彙征字泰初漂陽人記問該洽寧宗朝知崑山以廉平服人績治著聞調繁昌卒

孫應時字季和餘姚人從學於陸九淵為黃巖尉有惠愛常平使者朱熹重之丘崇帥蜀辟入制幕改常熟縣既秩滿郡將以私憾拮据倉粟累政欠三千斛詰之士民相率擔負詣郡願代償不報竟坐貶秩後通判邵武軍在縣嘗撰縣志

袁韶字彥淳鄞人嘉泰中為吳江丞蘇師旦挾韓侂冑
威福撓役法提舉黃肇檄韶覆田定役師旦密諭意
吳江多姻黨宰相容當薦為京朝官韶不聽是歲更
定戶籍承徭賦者皆師旦姻黨師旦怒諷言者將論
韶肇亟白於朝且薦之未幾師旦敗改知桐廬縣嘉
定末為臨安尹十年道不拾遺紹定初拜參知政事
浙西制置使仍治臨安許景迂丞吳江作堂廳西題
曰景袁以致仰止之意

張漢之為崑山令其父兩為憲漕五領郡符而家極清
貧漢之政務寬厚緩於索租邑人言其家自來無此
故不欲與人索也

潘友文字文叔東陽人朱熹呂祖謙皆與友善開禧初
知崑山縣寬慈愛人人呼為潘佛子

呂祖憲東萊人祖謙之弟嘉定五年知吳江重修學宮
有記刻石

惠疇字叙之江陰人知常熟縣劬農勸學擢良槩姦政

以大成曾丞相榜其闔曰景言以旌之

高衍孫四明人嘉定初置縣未有官宇衍孫首知縣事
初建治解城隍坊陌壇壝學校靡不周飭煥然新觀
唐璘字伯玉古田人嘉定十年進士調吳縣尉有殺人
於貨挾其舟亡者有司求賊急屠者自告吾兒實殺
之兒亦自誣伏璘問舟何在錢何用其辭差互璘疑
為緩之果得賊太湖與舟俱至勢家治圃將鑿渠通
舟繆言故渠常平使主之璘視乾道舊籍則民田也

力爭遂迂使者意移監縣稅尤以直聞後歷終太常少卿

孫沂字彥溫丹徒人為常熟丞時長官有挾不屑民事凡縣務承上戢下惟賴有沂民有淹歲不決之訟皆直請於臺府願以屬沂旁縣亦然臺府既以為常沂亦不復計彼此以疾歸卒

孫子秀端平中為吳縣主簿佐王遂僂妖人事詳見遂傳

吳堅字彥愷天台人淳祐中為崑山主簿以厚風俗正人倫明義利闢姦邪為先務德祐末拜相

項公澤字澤潤永嘉人淳祐閒由長洲丞辟宰崑山前政自李枕滿秩後更十三任不以善去公澤由童科擢第以文學飭吏事留意學校買田養士為政廉敏百廢具舉嘗脩玉峯志官至中奉大夫

徐聞詩字子言嘉興人性頽悟八歲通九經理宗朝由童科擢第淳祐中知崑山官至知惠州

王丈雍寶祐中尹常熟重修城闌及譙樓置刻漏創兩
務官廳濬市河福山塘築新隄葺亭甃衢飭整版籍
蓋使民有義者也

黃震字東發慈溪人寶祐末調吳縣尉縣多豪勢家告
私責則以屬尉民多飢凍窘苦死尉卒手震至不受
責家告復白提刑孫子秀移文一路禁戢之民有少
爭有司俾尉羅弓矢以捕怨家移牒必曰躬親吏卒
因下漁獵震又請於知府洪燾自是訟牒無躬親之

文尉解舍隕壓震新築之縣界有焚屍亭壞浮屠規
復初震白府謂焚屍釋氏之法凡史傳所書仇怨刑
戮之酷罪盈惡極乃有焚滅遺骸亦戰國以來之事
古無有也然殺者常刑焚者非法非法之虐且不可
施於誅死之罪人况父母骨肉乎今吾所法釋氏邪
聖人邪傷敗風俗莫此為甚其亭宜令勿再置判府
程元鳳韙之事竟止府檄攝其縣及長洲華亭皆有
聲效提舉常平王華甫辟主管帳司文字時知本府

朱熠常州錢庚孫嘉興吳君擢皆倚嬖倖厲民華甫
病革強起劾罷三人震贊之也震屢歷牧守在在有
績終浙東提舉常平嘗曰非聖之書不可觀無益之
詩文不作可也居官恒未明視事事至立決自奉儉
薄人有急難周之不少吝所著日鈔百卷卒門人私
謚文潔先生

陳應角字軒伯連江人咸淳三年知丹陽縣清強剛介
治聲翕然竄豪民辨誣枉行鄉飲旌孝義洎去官邑

民生為立祠歷長洲縣改提刑司主管文字

龔凜字深文高郵人居鎮江歷知長洲縣官至司農卿
國亡士大夫居班行者隨例北上凜行至莘縣不食
卒子璠別有傳

孔文貞字從善東平人宣聖之裔至元丁亥尹常熟是
歲大潦漂沒田廬飢莩流離文貞發廩拯溺完活甚
衆明年躬督郊民疏港浦洩積水而注之江秋乃大
獲邑賦數千石故匿於世家吏不敢問文貞覈實其

數勢家感其至誠遂盡輸納其政大歸在安民不邀
浮譽至或怵以權勢啖以貨利乃毅然弗顧吏民望
風畏愛之博學工詩詞與邑士賡詠文采可觀去任
踰年邑人追懷善政立石刻銘

王安貞字吉卿安陽人補浙西帥府掾至元二十九年
授浙省理問知事累遷崑山知州適州初遷公宇百
無一二安貞規畫剏建費鉅而不擾政教懋舉秩滿
授饒州路治中

王柔字不剛大都人試安西王相府令史至元三十年授吳江尹修繕官宇重建廟學及三高祠施政條理井然

姚鎬字周卿邯鄲人元貞間任常熟主簿督視許浦永豐倉潔已繩下芟櫛蠹蠹庾積清實丁亥夏雨田陸混一富室閉糴粟價翔踴鎬出郊勸分爭相割助督浚運河經度盡瘁按訟平當馭吏嚴而有度不聽讒愬不畏強禦

盧克治字仲敬濮陽人大德間為常熟令沉敏宏遠復
多仁恕獄無冤濫好施勸分教育言氏子孫覈實學
田築社稷壇恢拓公宇增修邑志民為立生祠令列
祀學宮名宦祠

哈喇哈遜大德九年同知吳江州事嘗語人曰牧民之
官不忠勤何以盡職分不公正何以聽獄訟不慈仁
何以得民心歲荒且疫為之流涕白州長留粟救之
曰寧拂上意以受責毋令民失所也

皇甫壁字君寶東平人至大三年知吳江州三載終始以廉能著不事智數政無矯飾待物一於誠始勉以文教申之以禁令人莫敢犯

王英字世傑燕山人先任大同路推官皇慶初知常熟州事寬而弗弛嚴而弗苛政教修明操縱協宜訊讞詳允至於獄空

伊埒哈雅蒙古人任崇明州達魯噶齊皇慶間兩淮運司僉民為竈丁運使臨之甚嚴哈雅昌言曰吾州孤

立海心民鮮而貧豈堪若是乎寧斷吾臂弗能發一
丁也運使束縛以法辭色愈厲乃聽之夏旱齋禱宿
於寶慶觀妻方病亟不顧翌日家人來曰夫人死矣
哈雅曰吾為民禱雨未獲乎應汝等自歛之吾不可
歸也未幾雨大霈

任立字周卿延祐三年知嘉定州主儒術而吏法明練
廉正不阿嘗釋冤獄四十九人全活飢民六千餘戶
高仁字壽之濟南人知吳江州以大義開曉百姓誦健

束手而怙終賊刑歲役先鉅室力稱事辦行省賑杭
飢民增糴三萬石仁抗言州小數已溢不可增鹽運
司課虧省委仁詣浙西取諸民補之仁言民貧不可
妄動動且有外虞皆不能奪事並寢延祐二年經理
田糧省檄仁往丹陽金壇兩縣兩縣舊公田虛額七
千仁曰朝廷豈利無田之租哉閱實悉除之

和斯噶爾欽察氏由宿衛入官至治二年知常熟州達
魯噶齊凡州事悉倚辦於里正民有訴不勝役者數

十戶乃曰里正雖卑而責任易稱其力而均任之田
不過一頃者皆釋不事諸役皆倣此吏不得夤緣規
利未幾朝廷聞浙右田有賦存而無徵者里正歲代
償至破產議勸富民助田以紓之擇和斯噉爾視事
乃得民一百五十餘戶田一千一百三頃歲入米六
萬四千石慎屬人出內民受廣利又奉省檄勸富民
移米平糶廉知田已鬻而抑派者居四之三凡為米
四萬九千石有奇茫無可擬乃奮身廷辯以去就爭

之卒得蠲釋轉徙就食者日來歸募民墾荒田八十餘頃歲增賦三千餘石開淞江浚練湖修大成樂令學官課講焉泰定丙寅滿去民請湯彌昌記其遺愛諾海本蒙古鴻吉哩氏泰定初以武德將軍為崑山州達魯噶齊時州遷纔一紀公宇器用一切營辦刻石志之

張顯祖不知何許人泰定元年為吳江州判官重建長橋撤去木柱鼎建石竇六十二榦每竇用鐵鉤八條

長十三尺重四斤仍布杪枋於水底築址以防傾圮
畢功宴犒工人甚厚

段天祐字吉甫河南人泰定甲子進士選為常熟州判
官有文學

班惟志字彥功松江人至元間知常熟州能文工詩尤
善揮翰

博囉特穆爾字存中唐古氏至正辛巳監崑山州適初
立都水庸田司開疏河渠受委臨督竭思經營兼存

於卹工就民罔怨恫修舉廟學禮樂力善愛民有仁
恕之風

李呼圖克盛爾至正中任崇明知州三年六月旱乃自囚
服跣行赤日中徧走祠廟以禱果得大雨禾則復蘇
海高昌氏由中書舍人提點資乘庫至正五年為吳
江州達魯噶齊其養民惠興築石塘水利甚博

巴咱爾字思齊伯蘇氏至元丙子監崑山州警敏詳審
先有儉人睥睨學宮屏斥諸生且立石以滅其跡巴

咱爾下車慨然以興復自任葺廟宇建采芹亭綵繪
髹漆煥爛一彰風俗丕變

史文彬丹陽人至正九年領崑山州事明年春海寇犯
太倉官軍入海勦捕連數百艘文彬悉出官帑餽餉
無擾於部前此兵出將卒橫悍所過剽掠無異寇盜
民間師至輒驚駭罷市俄有卒稍肆譁暴文彬取撻
於市置諸獄衆乃戢新孔子廟增廣生員勸督農桑
均簡徭役士民悅服之

張經字德常金壇人博學通才為一時之望初任吳縣丞至正丙申行省以牧字者罕良遴選而更張之自經等令丞簿尉同日命十一人盛賜遣之經在任三年以政最陞知縣事仁恕公廉教化平易折獄明慎時擾攘之餘繼以凶疫民死者半經焦勞全活百姓感懷省又陳薦擢嘉定州同知

俛僖斯高昌人至正二十三年知崑山州事布政和平境內忠貞孝義之事多所旌白以縣為張昭陸遜故

封立廟以祀又葺王徐李衡劉過及朱虎妻茅節婦祠墓置田給贍邑士賦崑山五詠以美之

孟集至正二十三年知崇明州州有三沙州治東沙上視兩沙為最貧地不宜五穀惟逐魚鹽仰商賈貿遷為食或遇風濤則懸釜待爨故米價常倍於他不必凶年而有困乏者集眎政三月攷圖問俗倣古置常平倉於州治之南以時糶糴物價用平人得接食而公無折閱焉集讀書績文惠政甚衆

費復初字克明壽張人至正間為崑山知州剛直廉明
推赤心以待人時州治初復及學宮久廢咸為拓闢
改築公暇與諸生講求義理汲汲不倦

實沙蒙古人至正中為崇明州達魯噶齊七年八月海
寇多發市井艱糴民不聊生實沙歎曰我長此土治
此民期與同樂爾令民病我獨不病邪即統捕盜司
及水巡官兵坐哨船出海勦捕市人爭從之遇賊於
海衆鼓而前自午至酉賊勢潰殺傷莫知其數實沙

誓衆曰要必全獲醜類以清水陸敢有不前予即戮汝時日昏不能進實沙命船圍守欲大戰夜半風雨驟作賊黨乘昏遁去

姜復昌嘉興人任崑山州判官廉而才時津助法行與省官覈產程役審諦平愜寬免單窶氣容溫舒而遇事執直長官獷悍詞色為屈秩滿將去民爭預餞之復昌抵夜潛往咸嗟悵而退

張成德字彥卿東平人至正間知常熟州政目紛複獨

以理勝欲以重鎮浮民習用新稼穡征徭刑獄庠序之間皆有善法數致老成詢察疾苦暇日命酒賦詠陶然真澹士庶愛誦之

盧鎮淮南人至正間以領兵副元帥兼常熟知州雖起武弁而崇奉儒術延邑士修琴川志時兵民雜居戢而不肆鎮之力也

巴哩雅字政卿至正十一年三月任崇明州達嚕噶齊明年州址為潮吞嚙乃相地遷之閏三月海寇犯崑崙

山燔劫糧艘民舍亦犯州境巴哩雅親率丁壯分扼衝要將攻之寇聞遁去十三年冬復以官兵出海擒寇時藉其功

僕斯河西人元末知嘉定州以全城歸附洪武二年擢為符寶郎奉使高麗歷官尚寶丞戶部郎中擢尚書轉吏部卒

張率字孟循臨川人國朝吳元年知嘉定州是歲上海民錢鶴皋作亂入城據之率被執脅以兵刃不屈囚繫

松江郡獄既而大軍平松江率獲歸舊治先是朝廷
命俞平章守太倉聞嘉定失守遣兵來援會率自松
江還乃諭之曰吾已在此爾勿妄動衆謝曰幸公無
恙願聽約束不敢撓州人也民賴以安及罷任去老
少皆為之涕泣

劉秩字伯序豐城人吳元年崇明知州始赴任渡海
指天誓曰苟犯民秋毫者有如此水既至務興利除
害是歲六月大旱禾盡槁秩禱而雨冬復旱麥不出

又禱而雨抑豪武撫善良均賦調息兼并修學校正風俗奏減酒稅鹽課與塗田未成而有賦者懇章凡四上省其估三萬石有奇民感其惠建生祠於寶慶觀之東邑人秦德為記洪武二年天賜鹽場管勾督運官鹽因襍販私醮秩以長吏當提點鹽法發其奸由是奸黨弗逞誣搆以事其子名孫孫年甫十二訴于部使者使者與見上上親問之得其實奸黨皆伏誅秩竟棄官歸事載翰林學士危素獄記秩長於詩

詞有聽雪蓬詩集

李彰知常熟縣性寬厚有大畧洪武二年春邑人朱
蝦蟆劫官庫作亂居民升屋以瓦擲之賊斃守兵踰
城飛報蘇州太倉二衛翌日兵至城下彰出迓之從
容謂其將曰民盜民捕之已盡衆來何為吾已聞於
朝矣出牛酒勞軍請駐以待報詔遣王御史來視彰
與耆民逆於境上具陳其故御史曰民不反盜已滅
矣遂令兵還民指謂子女曰爾輩李公活之也令祀

於名宦祠

孔克中字庸夫宣聖五十五代孫洪武初知吳江州
二年改縣克中仍為知縣重建縣治及垂虹亭三高
三忠二祠應祀廟壝罔不修飭惠政聿新

曾觀蘄州人洪武初知吳縣以公勤稱縣左右安仁
美政東興西城等坊皆觀建也

張榮陽穀人洪武二十年為崇明主簿寬和慎勤愛
民甚切以憂去任終工部主事

鄭珣福清人第進士拜監察御史洪武二十一年改
吳縣知縣廉勤能幹吏民畏服之

李廣佑建寧人洪武二十七年以進士知長洲縣廉
能有惠政卒於官

周伯陵武義人洪武三十年以人才辟知長洲縣政
尚寬平獄訟清簡後調江西布政司副理問永樂五
年復任本縣卒於官

江恕漢陽人先任福清知縣洪武三十年調崇明明

而善斷民不敢欺永樂元年考滿陞刑部主事士庶
赴闕借留擢蘇州府通判仕至台州知府

芮紳字子翔初姓魏郟城人洪武二十七年進士擢
崑山知縣首擯祇候諸蠹治者舊有催糧勾軍官校
久事邑中輒以籍官屋為牢禁里甲輩淹滯時月多
死紳悉解遣復奏劾官旗娶婦生子於邑者朝廷命
御史李嶽究治械送京師凡二百餘輩永樂元年坐
事發遵化炒鐵老人王榮率衆伏闕懇奏詔遣馳傳

還任後奏除事故包荒田糧十八萬三千有奇尋以
涖潦奏開吳松江淤塞二十餘里尚書夏原吉太常
少卿元復臨視之卹陳開新塞舊之策多見采納功
以就緒五年以母憂去未幾陝西按察僉事馬祥薦
卹才堪理劇吏部奏崑山固劇邑卹素得其民俾再
還舊治十三年丁父艱去卹為人雅正寬平務存大
體畧近名赦小過書削紛糾治之綽然善績莫可指
數

柳敬中慈谿人洪武三十一年以登封教諭陞常熟
令釐務精敏興植墜廢崇儒敬士開闢田野孔氏子
孫有漂落邑中者貧不能娶敬中曰罪其在我乎烏
可使聖人之孫無後也為娶妻築室於宣化門外給
水陸之產為養又得范文正公之裔復為築室贍以
廩食製衣巾具束修遣入邑庠其舉政不迷類如此
永樂六年以憂去服闋吏民詣闕請復任陞本府同
知今亦祠於學

林暄仁和人洪武三十一年由監生試常熟承三十三年實授守身謙潔綜事勤公保護善良禁抑豪猛永樂五年以求賢陞袁州府通判

陳耘福山人洪武三十一年主吳江簿蒞政廉平民信之後陞監察御史紹興知府致仕

陳瑗烏程人由訓導累陞大理寺丞洪武三十二年左遷常熟簿永樂元年復舊任瑗為人言簡而中理動止有則

吳永建臨川人由嚴州監察御史洪武三十二年調知嘉定縣在任四年廉公有猷為益以無倦始終不易永樂元年有詔徵用縣民沈文仲等赴京保留不允復任御史後陞山東副使

黃子威進賢人洪武三十三年以儒士授長洲丞蒞事勤敏刑罰清簡民甚安之永樂元年秩滿陞刑部員外郎歷松江知府

樊鎮柘城人由監生任照磨擢知吳縣勤慎著聲

韶護岐山人洪武二十九年自戶部主事左遷崑山
典史勤恪敏達事無疑壅譽逮於上後陞仁和知縣
高瑞為常熟知縣嘗著敝袴隸人戈孟遠竊見之納
絹二匹於衙內瑞諭而鞭之加絹於項扶出之

高居正廉介好善博通經史洪武中知崇明奏移城
遷縣功為首稱

王瑛建安人亦洪武中知崇明時徙建城郭創縣治
定坊巷構公宇相度經畫其功居多從子銳字允威

以進士知山東之新城內艱服除調補崇明審驗人
戶類分上中下三甲九等仍為縣區圖三冊定其徭
役貢賦之法庠士素乏科第選敏者置後堂政少閒
輒入與講繹經傳竄改程業士以銳治易往往改業
自是科第相望天旱蝻生耆老請事符醮以祈銳曰
非儒者事可祭八蜡之神乃齋沐自製文率僚屬祭
之祭畢其日即雨三日乃已遂為有年業文莊公盛
為傳刻石累官副都御史

連俊邠州人為崇明知縣剛毅果斷鋤強扶善田圯
於海而民每歲償租俊奏蠲之宣德癸丑蝗上司以
軍餉所賴不免秋租俊請以菽麥代賦軍不乏給而
民便之甲寅復大侵申借常熟官糧萬石所活不勝
紀

陳敏仁和人洪武末為吳江縣主簿明果而恕陞刑
科給事中

蔣奎南昌人聰明而正直舉洪武末主吳縣簿三十

金史卷之八十一
年陞知吳江縣政號平允卒於官

王敬襄陽人知長洲孝悌廉謹著稱於時永樂二年
應求賢舉陞知泗州

蘓瓚河間人崇明丞當官勤廉尤致意於農事學政
永樂元年以母喪去官終工部侍郎

劉幹字孟楨修武人先授岷府紀善永樂初浙西大
水幹從夏尚書原吉來治改長洲丞兼理農事秩滿
以母喪去官民遮留愴切事聞復任幹宅心仁厚性

操廉白每出劬農周行膝壠呼老叟問所病苦慈孺之色溢於眉面所至民驩迎曰父母來矣歲饉民輸後期上官譴責以身當之曰此丞之怠職也請代其罰人有過當笞惟喻以理終不下鞭箠無不心服縣居不障風雨弊服惡食由之泰然洪熙元年卒於官無以為歛邑民嚴思敬等殯之頓於郭西僧舍及將歸葬士庶陳奠道旁悲悼若喪所生士人郭儀因人心眷慕之深留其衣冠於半塘側聚土葬之名曰劉

公墩詳見郡人樓文淵所撰墩記

賈忠字能誨冀州人永樂初守城有功生負授寶鈔
司提舉累陞吳江縣知縣忠有兼人之才處已廉明
臨政勤而恕秩滿去任民上疏請留後忤當道同僚
因誣執之忠不辨而退

劉宏字簡諒永新人永樂初知崇明縣勤謹有局幹
抑姦繩暴吏民畏愛去而思之兩詣闕請復任焉

朱宗顯諸暨人永樂七年知嘉定持身廉白去害興

利以疾卒官

邢寬直隸人永樂十年知吳江撫字有道民銜其澤
後陞成都知府

馬文炯山陰人興化教授陞扶溝令刑部郎中通政
使司經歷永樂十五年改知崑山縣政令明肅剛介
有守武斷削跡胥徒畏懾視之如神明無何卒於官
郭南上虞人宣德五年常熟縣主簿保陞知縣幹辦
修舉獲上使民南故試吏老於吏事以之而舉其職

羅永年字延齡宛平人洪武初序班歷北城兵馬副
指揮宣德中知崑山縣弛張適宜下民賴之馬鞍山
舊無樹木永年徧植以栢歲久鬱然時人名為郎官
栢士大夫歌頌之

葉錫字玄圭永嘉人第進士翰林庶吉士正統元年
知吳江縣以廉謹聞未幾以母喪去改知吳縣政事
尤偉十年詔大臣察舉天下藩省郡邑長吏治行卓
越者得十人令惟二人其一錫也詔賜燕於廷加以

命服楮幣紀功天官以需拔任徐侍講理論其事曰
玄圭為治一本經術先律已而後齊人惟理之從法
之守他無恤也官長承迎之私不行僚吏比周之情
不接豪猾斂歛之姦不得行故雖深得細民之心而
忌者亦衆或軋之於上怵之於下咻之於旁玄圭堅
不動至是而循良之效白焉時以為知言十三年擢
守寧國

陳梗字用直臨海人先浦城令調山陽宣德間左遷

崇明主簿正統元年正月大雪彌旬郊外之民有凍餓死者梗愀然為發倉賑貸不俟上報明燭事理襟度灑然善詩篇詩法盛唐不尚巧麗

張潮字叔孚東陽人正統初知崇明威而不猛寬而有容補弊起廢勤勞不懈

吳昭字伯昭麗水人正統間由監生擢知崑山縣昉建狀元祠於馬鞍山間潮館於駟馬橋

黃貞通字仕達南海人景泰間為崑山主簿能識政

體司征稅公而有法邑人稱之

劉彪湖廣人以吏授丞吳江景泰六年陞知縣居官
不挈家累以廉幹稱

鄭達字叔通襄陽人博涉經史正統間授盩厔知縣
景泰五年移崑山有捕盜千戶不法殃民達纔至即
劾去之注思校學存卹窮赤歎歲勸貸民藉生活自
奉清約圖書少娛他無所好尤喜與方人端士接至
孝義貞節之事悉加旌白之

劉仲修泉州人崇明簿寬而有惠不事苛察凡第賦役高下高下者皆悅之秩滿去仕至工部主事

唐禮字敬身武康人舉賢良方正天順初知常熟縣文雅有為重建子游祠建道愛亭立進士題名碑

甘澤字洪濟開州人進士任監察御史左遷滁州衛經歷成化元年巡撫劉孜薦陞常熟縣知縣食正五品俸莊方善建事大著勞績修學宮城隍廟重建東南二倉造倉畔二石橋四年以事罷

鄧珙字弘中閩縣人成化初以進士知常熟首誅姦惡以剛果稱九年陞南京戶部主事

龍晉字遵叔吉水人進士授監察御史天順初改知

嘉定縣善政甚繁疏吳淞以利田庸績尤著

晉浚江得石刻

於水其文曰得一龍江水通

歷守徽常卒

白思明平定人成化初以進士知嘉定縣廉能著稱
三載召為文選主事

余金字貢之內江人成化初以進士知長洲郡吏作

姦金以理教誠不率者稍加懲艾皆為改行民多訐
金不設鉤距一以公議裁決無容心焉訐者謂不可
欺亦不可犯稍引去其終訟者轉詣上司上司曰汝
自有賢令毋庸至我其人亦解散徭役丁夫每患為
加人顛倒金置手籍默視始得其平豪夫富子不少
假借謝絕請託安守儉節防戒家人甚嚴不得輒至
中門嘗見凡有紙畫數幅乃其子購之他地者悉取
焚之十年召為監察御史

姑蘇志卷四十一